

Introduction to Biblical Christian Worldview

© Conrad Jun Tolosa
Revised March 20, 2020

Part One – Ang Tamang Pananaw

▪ Ang Mabuti

Sa simula sinabi ng Diyos, “Magkaroon ng liwanag,” at nagkaroon nga ng liwanag. Nakita ng Diyos na mabuti ang liwanag! Pagkatapos, ginawa ng Diyos ang kalangitan, karagatan at mga lupain. Sa lupa ay naglagay ang Diyos ng damo, mga bulaklak at mga puno. Nilikha Niya ang araw, buwan at mga bituin upang mabukod ang araw sa gabi. Pinuno Niya ang karagatan ng lahat ng klaseng isda at ang kalawakan ng lahat ng uri ng ibon. Nilikha rin ng Diyos ang lahat ng uri ng hayop at kung ano-anong mga gumagapang sa lupa. At, nilikha Niya ang tao. Sa ginawa Niyang paglilikha, pitong beses Niyang binanggit ang salitang “mabuti.” Ang Kanyang mga nilikha ay nagbigay kasiyahan sa Kanya.

Samakatuwid, ang mabuti ay yaong nagbibigay kasiyahan sa Diyos. Ang masama ay ang nag-uudyok ng Kanyang galit at parusa. Naunawaan ni Eba’t Adan kung ano ang mabuti’t masama nang sila ay sumuway sa kautusan ng Diyos. Ang kanilang ginawa ay hindi naging kasiya-siya sa Diyos kundi ito ay nag-udyok ng Kanyang galit at parusa.

So, ang tanong ngayon ay, *Paano tayo makapagbibigay kasiyahan sa Diyos?*

Para makaupo sa bus, lumalakad ako mula sa Mendiola hanggang Quiapo. Sa aking paglalakad marami akong napapansing nagpapalimos. Minsan, kasama ko ang isang kaeskuwela. Nagbigay siya sa isang pulubi ng diyes sentimos. Malaki na yun ng mga panahong iyon. Makakabili ka na ng Coke. Tanong ko sa kanya, “Bakit ka nagbigay?” Ang sagot niya, “Para makapasok ako sa langit. Mas marami kang nagawang mabuti dito sa mundo, mas malaki ang iyong chansang makapasok,” ang hirit pa niya.

Sa Genesis 4, matutunghayan natin ang kuwento ng magkapatid na Cain at Abel. Minsan, pareho silang nagbigay ng handog sa Diyos. Si Cain ay magsasaka, si Abel naman ay isang pastol. Nasiyahan at tinanggap ng Diyos ang handog ni Abel mula sa matataba niyang tupa. Subalit tinanggihan ng Diyos ang handog ni Cain mula sa kanyang ani. Sa Hebrews 11:4, malalaman natin ang kaibahan ng dalawang handog. Ang handog ni Abel ay nagmula sa pusong may pananalig sa Diyos. Si Cain ay walang tiwala sa salita ng Panginoon. Ang Diyos ay nakatingin sa puso ng naghahandog.

At kung walang pananampalataya hindi ka kalulugdan ng Diyos. Hebrews 11:6a Ang paggawa ng ano man na labag sa sariling paniniwala ay kasalanan. Romans 14:23b

Sumunod si Abraham nang tawagin siya ng Diyos upang magtungo sa lugar kung saan matatanggap niya ang kanyang mana. Nilisan niya ang kanilang bayan kahit hindi niya alam kung saan siya pupunta. Hebrews 11:8

Maraming tao ang nag-aasikaso ng kanilang permits at documents sa gobyerno. Narito ang challenge. Para sa isang ordinaryong mamamayan, kung nais mong mapadali ang facilitation ng iyong mga documento, magbibigay ka lang ng padulas o lagay sa taong kausap mo sa opisina ng gobyerno upang lumakad ang iyong papeles. Sa kalagayan naman ng empleyado sa gobyerno, mas malaking hamon ang kanyang hinaharap. Tatanggapin ba niya ang padulas o lagay na isinusuhol sa kanya ng isang tao na nangagailangan ng documento mula sa kanyang opisina?

Ano ang pipiliin mo, ang Diyos o Pera? Ang paggawa ng para sa sariling kapakinabangan ay hindi mabuti sa mata ng Diyos.

Ang ating mga pinaniniwalaan ang magdidikta kung ano ang ating mga pahahalagahan. Ang mga bagay na ating pahahalagahan ay ang iniisip nating mabuti at tama. Kung naniniwala ka na ang kayamanan ang tanging makapagdudulot ng kaligayahan, pipilitin mo kayang kumita ng maraming pera kahit na sa masamang paraan?

Ang mabuti ay yaong nagbibigay kasiyahan sa Diyos.

So, mahalaga ang triad ng totoo, mabuti at tama.

Pag-isipan at Sagutin:

- Si Mang Tonyo ay nahuli ng traffic enforcer for illegal parking. Nang titicketan na, pasimple siyang nag-abot ng pera (lagay) sa enforcer upang makaiwas sa hassle ng pagtubos ng lisensya at pag-attend ng seminar. Ang ginawa ba ni Mang Tonyo ay masabi mong mabuti? Paano mo nasabi ito?